

竹林八圩志卷八

祝廷錫纂

文徵內編

高遜志

遊廣福寺記

士之有志於斯文者華門蓬戶而弗陋穴衣聚食而弗耻
晝誦暮惟服勤靡懈鑽研六藝以究其說蒐獵百氏以成
其能孜孜矻矻刈精竭慮錙積而銖累之日儲而月盈之
蓋亦勞且艱矣於是協之以動靜張弛之道和之以藏修
遊息之宜凡佳時令節春秋清明之際則必與良朋篤友
相徜徉乎郊坰牧野間求幽遐奇絕之概瑰偉宏廓之觀

竹林八圩志

卷八 文徵內編

而肆其登覽臨眺之勝以見夫堪輿之無窮寒暑之相代
洪纖之勞瘁動植之屈伸所以開聰發明祛蔽扶滯踈淪
其心宣通其氣擴其志而充其才也豈若藝人逸士遊目
騁懷流連光景羣嬉屬好之比者哉甲辰歲之九月九日
河東牛憲使伊甫諒武林陳編修彥博世昌天台徐教授
大章一夔四明周教授致堯葉釋良琦元樸興聖住持暨
癸志六人者同為廣福寺之遊廣福距城東三里許乃泛
舟由春波門擊楫鼓枻沿流而東未移時已至其處咸連
袂徐行遙睇翫矚涉荒蹊度危橋敗礎殘甃翳于葦莽而
豐堂廣宇之存者數十楹而已獨浮屠巋然兵燹之餘飛
金湧碧穹凌丹霄因竝立瞻仰而員頂方袍之衆屣履出

迎延憩西序適僮賈以香來貨熏而藝之網蘊馥郁氣馨而韻遠披圖嘷茗列坐以自休既而主僧玉田師導客登浮屠廼振衣擠裳聚足連步偃僂縈紆聲屬函道逮其三級而止時夕靈晝幕厲風西來繼以靄霏皆循欄環楯徘徊四望洞庭羣峰隱約微茫騰伏天末而畎畝町畦衡巨從合禾稼之植芄芄濛濛連隰接畛莫窮其涯至于村墟野茨之遠近風颿雨舶之往來農人行旅之斷續一舉背而盡得之已而層陰解駁陽景暫漏興有未及盤桓忘返因濡毫書名氏及之遊之歲月而降惟伊甫疾趾弗克登促蹶久之而莫敢強焉乃為之設醴設菽雜陳獻酢有序雄談放論出經入史歡乎其相得邈乎其相忘超乎若脫

竹林八圩志

卷八 文徵內編

二

瑛氛而絕塵囂也吳志舉觴言曰諸君子咸以中州之英炎虛之秀遺時繹騷適寄茲土其緝學厲行固非朝夕之所致或輔法風紀或載書清華或職教庠序而文章德業莫不流聞于時今廼伏聞隱隩視世之窮達得喪不少易其志而存養踐履之久學成行尊方將入仕王庭當夫任發揮其所蘊于以端本而整焚于以興教而崇化豈得一游一行以自適而已乎元樸雖寄迹方外而博通載籍善歌詩疎蕩超邁識論灑然故魁公碩儒多與之遊若吳志之鄙陋諛聞廢學斂然不知其不足何足以廁于諸君子之間哉然邂逅一日之樂則不可以不識也于是咸引觴滿酌就醉而歸因用杜少陵玉山高並兩峰寒之句各取

其一言為韻以賦之得古詩七首與志復為之記云

志

跋南湖賦後

右南湖賦一首前太常博士陳君彥博所作也君世家錢唐而往來於秀館南湖之上者三年故托賦以寓其志其體物屬辭精密瀏亮有不待贊揚竊嘗誦其歌曰南湖之清兮可以濯纓南湖之上兮聊寄我情後千載兮知有慕其遺聲則其志之所存而期待之重可見矣然古之君子學識之富志節之高才藝之美未盡施於事業往往托於文詞以自表見於世至其造詣之微蘊蓄之素自非所謂知言者殆不足以窺其涯涘而世之鄙夫庸豎以其公聞麼識臆度而私付之不惟弗信其所有又從而嘲哂詆訕

竹林八圩志

卷八 文徵內編

三

焉蓋亦無足怪也君以奧學素行受知名公卿其文詞翰墨為時所推重編摩史館贊教成均暨官容臺而國有大典君考覈損益於禮文之事廷議建之方將升華陟要而遽辭歸養其學識之富志節之高才藝之美無愧於古君子者未可以歷數乃能夷視窮達徜徉詠歌而托興以自況雖茲湖之廣且大有非雲夢洞庭之比而世鮮有稱之者然地因人而始重名待文而後傳昔之荒陬絕域穹崖峻壑澗溪潭洞之間碩儒魁士之所游覽而一吟一咏之遺藉以聞於世者多矣庸詎知茲湖不待於君而顯也乎余因奕世之契雖粗知君而辱君之知尤厚用識篇末以俟續郡志訪焉

柳志

沈淳

妙峰橋記

新豐嘉興郡治東南巨鎮長溪界乎中曰漢塘舊有橋曰妙峰久傾圯民病涉有年矣鄉之巨姓金景瑞屠世英輩相與謀各捐貲首倡復推本庵比丘如廣洎淨相比邱永繼佐理其事遠近莫不興起不閱月錢以緡計者凡若干舊制低矮乃宏其規模中下環石為洞壯麗堅固往來者皆免跋涉之患經始于成化五年十月落成于次年十一月縣志按此碑已佚縣志節錄其文如此因照登之

高道素

重修關帝廟記

萬曆四十七年

竹林八圩志

卷八 文徵內編

四

去郡城東南四十里有鮑塔庵宋端宗時元兵徇臨江知州鮑廉死之此為瘞骨處也庵前有關帝廟並躬自景炎間一死漢室一死宋事雖名業殊異而忠魂義魄頽頽今古嘉靖乙卯倭寇犯境肆劫里中一炬而鮑庵焦土帝廟則歸然獨存入夜廟中赤光燭天空際有干戈憂擊聲倭始駭走鮑村之民得庇無恙自後雨暘豐歉每禱輒應乃靈宇卑陋鄉人思有以宏其圖而力未逮也神宗朝太學生胡君日華捐索金鳩工庀材不踰月而廟貌煥然改觀矣再新鮑庵顏以樂善捐田二十三畝俾守僧焚修其中嗟乎世之所稱高人碩士者往往藉熠燿之光爭蟬蛸之望不圖懸聲魏闕便思釣譽林泉安肯向孤鳴鳴嘯之壤

螢飛磷走之墟尋往事弔遺風俾忠臣烈士在天在泉之魂魄不至銷沈而黯黯者乎今入其鄉庵廟依然漢漢壽宋臨江千古不朽之生氣凜凜如在微胡君遠識卓見表揚忠烈曷克臻此哉余時以營繕奉使南來得志庵廟之由如是司志

高道淳

重修慶善橋記

新豐市南慶善橋崩行者股栗許君惺涵里之長者叩予以請予曰此善事亦先志也敢勿盡力不三月而橋成惺涵復過予曰尚有太平橫坳二橋俱頽廢此利涉而彼望洋仁人忍乎予亦傾囊重建非惺涵終始經營安得速竣

竹林八圩志

卷八 文徵內編

五

如是時天啟壬戌歲

縣志按此亦節錄

高承埏

明中順大夫文忠府君傳

府君諱遜志

一名與志

字士敏號耆庵宋衛烈武王諱瓊十四

世孫也我高氏自春秋時齊上卿高敬仲諱僕以王父公子高氏為氏是為高姓之始後漢渤海太守諱洪居渤海菑縣苗裔顯於後魏北齊隋唐之間烈武王為唐太傅特進尚書右僕射開府儀同三司平章政事許國文獻公諱士廉十一世孫澶淵決策大功載在宋史宋欽宗靖康二年五世孫太傅忠節公諱世則自汴扈從南渡遂為浙江人宋亡忠節公五世孫太學上舍諱文思因烈武王從子

繼盛昔為徐州刺史有恩澤於民遂避地徐州之蕭縣元
順帝至正十一年辛卯四月蕭縣盜芝麻李二作亂上舍
公曾孫諱德避兵還居浙江是為府君之父以碩學至行
為部使者推擇歷掾三臺御史府出為淮東廉訪司照磨
歷官至浙東宣慰司都事善歌詩有紀夢集十卷又彙一
時宗工鉅儒虞文靖公集歐陽文公卒曹文穆公鑑余文
忠公闕戶部尚書貢公師恭監察御史程公文江浙行省
左丞周公伯琦翰林學士承旨張公翥危公素直學士張
公以寧所贈詩文彙為自得齋類編若干卷以授府君府
君遵承庭訓窮日夜之力以務記覽作為文章咸中規度
年甫弱冠已與老成作者有並駕爭先之意而宣慰公向

竹林八圩志

卷八 文徵內編

六

所與文游如番陽周公伯琦宣城貢公師恭臨川危公素
皆在府君以契家子持所為文贊之皆曰人言高宣慰有
子信然手其文不置嗟異久之且勉之曰他日人之求知
於子甚於子之求知於我矣府君益自奮勵時天下方亂
或棄而他業府君竊笑之益力不懈而四方求文者亦輻
輳其門文日益有名深醇典雅成一家言至正乙未府君
年二十有五以薦起為鄞山書院山長尋拂衣歸往來蘇
州者五年與宗人季迪公啟及張公羽徐公賁唐公肅余
公堯臣王公行宋公克陳公則呂公敏友善時稱北郭十
友庚子七月府君乃定居浙西之嘉興是歲中秋同知吳
陵繆公思恭招同天台徐教授一夔桐廬姚教授桐壽會

稽江文學漢錢唐陳編修世昌郡人鮑貢士恂等集南湖以不可久留豺虎地南方猶有未招魂為韻人分一字即席成詩時在己亥兵後故借以紀一時之變也水西詩僧克新亦與席言及水西寺額田自南宋紹興間著在版籍豪民張春攘奪之府君力折張春之奸以田歸之寺甲辰九月府君又與河東牛憲使諒四明周教授棊及徐教授陳編修輩為郡東郊廣福寺之遊偕主僧守良賦詩為樂蓋府君流連觴詠絕意仕進垂十有五年太祖高皇帝洪武二年己酉始膺明經秀才薦三年庚戌二月詔山林遺逸之士未嘗仕元者續修元史仍命翰林學士宋公濂待制王公禕為總裁官府君與儒士趙公堦朱公右貝公瓊

竹林八圩志

卷八 文徵內編

七

朱公廉王公彝張公孟兼等十五人同纂修四月封建諸王授府君秦府紀善仍與纂修七月元史成賜白金二十兩文綺帛各二轉翰林院編修府君時年四十也累遷侍講學士未幾引退十五年壬戌十一月試吏部右侍郎萃其師友贈遺唱酬之詩文編為師友集囑杭州府學教授徐公一夔序之尋以事去官謫居朐山弟士表公正志往省之留二月以母夫人在浙堅遣之還有送弟南歸序反覆千餘言大概序其離合之故悲喜之情而孝友之意藹然已見乎其詞三十年丁丑又名為翰林院侍讀學士同館唐公愚士贈詩有傳巖起胥靡治長歎縲紲南冠鍾儀反前席賈生入之句愚士會稽人翰林應奉肅子也惠宗

讓皇帝建文元年戊寅正月同太常寺少卿盧公原質充纂修高皇帝實錄副總裁二月遷太常右少卿兼學士以
更定官制裁讀講學士也三年庚辰同吏部侍郎董公倫
典會試時府君已七十矣取吉水王良常熟黃鉞莆田陳
繼之崇仁吳溥建安楊榮後名子榮新淦金幼孜石首楊溥武
進胡濬太康顧佐時稱得人史官泰和周公是修題府君
小象略曰學足以為王者之師才足以為當時之傑道足
以為聖賢之徒行足以為後進之法再總國書而直筆泰
夫造化七遷官守而忠誠貫夫日月金石喻乎所執之堅
冰雪並乎所履之潔其推重如此詳載易苑集靖難兵起府君
與太常正卿黃公子澄籌國事黃不能用五年壬午讓皇

竹林八圩志

卷八 文徵內編

八

帝遜國府君欲從亡失讓皇帝所在遂避迹永嘉之雁蕩
山時府君老多疾苦僕從皆竄逸獨身屏處自矢為西山
餓夫適門人翰林院侍書蔣公兢至相對泣下奉侍府君
者五十餘日九月晦疾革就瞑之頃口咄咄指畫恨字既
而曰復何恨得壽七十有二兢窮途遑遽無以成禮林有
巨木其腹窪然乞諸樵叟斂而埋之於芙蓉峰北字惟
友亦吾邑人嘗受知於府君及黃公子澄後同黃公暨字惟
陶州知府楊公任謀興復事不成乃遁入雁蕩山得遇府君
盡送死之誼時黨禍蔓延子尚友公諱勛變姓名流徙無
定後禁漸弛曾孫南圃公諱葛始奉府君衣冠及元配元
顏氏恭人簪珮合葬嘉興德化一都常豐坊奚家橋北而

子孫遂為嘉興里仁十一都竹林里人宏治初嘉興知府柳公琰創修府志載府君與郡人僉都御史程公本立並卒於官蓋本於劉公琳拊膝錄中載程本立靖難兵至自經死又載盛庸兵敗王良自殺高某聞之亦自經也留銓志則載府君追謚文忠嘉靖中嘉興知府趙公瀛續修府志遂仍之或曰代宗景皇帝朝府君所取士禮部尚書胡公榮特請賜謚世遠年湮其詳不可得考嗟乎方公孝孺私謚文貞卓公敬私謚忠節龔公翊私謚安節斯民直道豈必盡遜禮官之集議哉神宗顯皇帝登極詔書已有革除死事諸臣忠於所事皆我太祖儲養忠義其生長鄉邑地方有司官或特為建祠或即附本處名賢忠節祠歲時

竹林八圩志

卷八 文獻內編

九

以禮致祭其墳墓苗裔猶有存者厚加卹錄有司始申請督學使者崇祀府君於府學鄉賢祠并覈墓田優免徭役南圃公曾孫膠州知州瀛臺公諱文登承埏曾王父也先中式隆慶丁卯舉人至是拜於祠下觀者咸稱忠節之食報云萬曆二十九年辛丑署應天府事鴻臚寺卿張靖恪公朝瑞補祀府君於冶城表忠祠三十九年辛亥十二月朔刑科給事中彭公惟城疏請祀謚遜國諸臣三百餘人而府君列次在三十六於是孤忠大節若揭日月而行矣今復奉革除死事諸臣精忠貫日苦節可風分別重輕悉與卹謚之詔修舉曠典此其一時因詮次家傳以備史國採擇焉十世孫承埏曰遜國之事視易姓有間矣我祖奉

身而退志節皎然豈爵祿之所能縻哉使生於今日其必
下從烈皇帝無疑承埏固守寶坻幸邀烈皇帝特達之知
褒其功在封疆而浮沈南土覲顏視息能無忝於祖德乎
悲夫

與吳巨手書

辭披雲於樂令而逐行塵于元規此行何草草也今隅虎
互哮幕燕猶夢茫茫江水都堪作買生涕淚矣吾兄澹寧
風概伯仲隆中仁望奮翼商飈持此一段忠孝血性滌腥
翦翳挈世清夷良為快事弟庸庸者且當抽簪製芟友鹿
盟鷗獲老川巖以全迂拙願至足也兒曹荒劣亟丐嚴繩
曲木必加厲斲頌金端倚矣墟不率司南教刑罔貫斯兄

竹林八圩志

卷八 文徵內編

十

推心之隆弟所加額而祝矣當事八行隨風噴往兩兄喜
有同心弟僅借為視草耳游鱗無間時避好音冗草不備
孟夏望日

前辱遠將迺返餘歉猶喜風便即兆兄長風破浪一日千
里時也并謝埏又行

與譚掃庵親家

還鱗及浦跼發良書辱老親翁殊愛層注戴首浴心嵩華
非重而江漢非浩也復捧至情之諭彌深感慙之衷金石
古期絲蘿切誼永推戚戚相關詎與悠悠同論適丁變勢
厚佩隆懷幸老親翁勿復為念前請未遂通膺何擢以老
親翁遙抱閱覽當世峰岫定應羽儀南國模式人倫讀見

聖新編耽味彌旬千載不秘秘扶窮研實可幽贊神明昭
煥聾俗刻成傾遲全寄以益枕中未有之鴻寶也弟蛙蹲
萍泊屢逢慘剝風昔寄意多付飄風晞露一二攸託樾蔭
既俸靈光敢復敝屣希屬記室都為津遣便齊明貺荷何
可言家春十挑輒附寶春仙舟奉上野人之曝願維莞存
敏老相與晨夕亦邸中一適所假鼎杯即為餉之若蓮觴
見歸并以佐老親翁竹葉之春可矣賤伴猥蒙大賚銜棟
良深鴻毛薄勞從者霜儉滋作鍾阜雲春春准月曙懷歡
望遠切担如何然烟樹雖遙蘭襟如接推莫加珍以迓嘉
祚扮榆近景要刳紛紜几席風波殆無寧宇弟多病無聊
飯心竺乾之業豚子過勤垂暍日為頂禮梅檀之座以報

竹林八圩志

卷八 文徵內編

十一

肺腑之德也手瘡痛劇不能多及臨風依切季春廿日

與敏翁世伯

知己各天每一念至必為數日黯然幸獲良書乍如披襟
為之歡躍知近況頗佳更可慰也貴邑與敝里邇甚紛紜
即深溪遐谷時無寧宇不肖亦兩逢其厄矣客邸高寄鶴
靜雲間便如真人天際禾中好事家所珍半類落于昨歲
之變殘幘裂幅時盈市巷大可太息惜不得尊駕來游為
之鳩拾自此翰墨神奇天壤間愈覺鳳毛麀角矣白門舊
磁充溢又可廉購亦屬僅事如茶酒杯盃口盆之類乞指
示小奚買一二以為山野陶愁必直儉者乃宜耳曾波老
聞時相晤不審尚可為吳越游乎里中舊識往年小照都

付飄風望之者甚衆能憇憇之一來當不寂寞也辱貺蓮
子杯捧之肩閒暫令患難愁容滌陶于清飲感不可言新
茗一甌多索鼎杯一對附展寸臆幸鑒存之朱明而戒歸
轅果然乎如果則良晤非遙預儲床頭濁醪俟相對話苦
辛也手瘡不能多及諸惟自愛為望季春望

與某書

患難各天暄涼夢度蘭暱心期渺焉河漢乃覺翦燭小窗
披襟促坐未識何時可嗣不勝睇浮雲而搔首矣相憶方
劇良書儼臻發械吟諷欣如握手年臺燕居多豫風瀾已
恬甚為躍然眉舞弟比抱西河之泪益疎蓬鬢之絲將老
蒲團尚依萱草至於城郭孤踪珠濶惟一屬子墨修歲時

竹林八圩志

卷八 文徵內論

十二

而已芳訊已令蒼頭偕致當有還郵倘晤言所逢一一奉
宣尊指不俟諄諄之及也弟百懷寒灰僅蝨魚積習滌刷
未盡厚荷餉帙歡愴交併歡者帳中獲此異書愴者宇內
已喪此異人爾黃五湖適梓冊府元龜何匪義所輯名山
兩藏書需之如飢特煩求訪竊願縮食而易恃年台知我
癖能為搜寄否耶帶水雖間游鱗可通好音時懷稍當嘉
覲乍還舊廬草草莫可附展徒有愧灼玉倚何期臨風勞
結

與遜翁年盟長

二通

武林回便道圖過亭并與若老為湯餅之客不意過臨
平白晝而過綠林行李都去遂狼狽迨返不復能踐初約

可見人生良晤之難也前承芳訊弟適避跡舊村未及裁報而秘簡復來發函歡笑兩窗愁寂如親話言滌其塵抱矣前快因東西轉徙猶未竟錄更俟後期年翁卒悟曠襟超埃濁之表弟望之若百尺樓上方勤躋攀所恨水各一方莫能昕夕以挹巾屑陶鄙吝惟有睨停雲而搔首想梁月以通夢已耳昨顧自老垂訪華門弟尚留滯鄉落未展尺寸之歡樂年翁為弟致此耿耿若老年兄近況何如掌上明珠當益壯采并希達意鷄首何時到郡舊使者尚在會城新旄節亦未有確耗也餘情附紀綱口悉不一
初七日

前插人一箸之供竟蒙峻卻至今怦怦焉心未寧也此來

竹林八圩志

卷八 文徵內編

十三

瀾息風恬良為可喜想履候多豫弟思扁舟雪夜問奇亭而俗累日纏惘惘蹉奪殊可恨也續離騷渴欲借鈔并年兄手定詩稿前承許假觀乞即付來樂甚樂甚弟當珍製鈔畢即返不敢遺脫耳適敝友陳獻可兄為榕壇高足今慨然將效張毅甫負信國骨歸葬吉州之舉慕年兄高義願聆緒論惟假片晷之暇相與把臂入林知不俟弟言之贊矣賤廝輩所辱隆賚斷不敢當并以附璧倘有緇衣坊記印本各求一帙即荷餘光之煇非甚也草草佈候筆不盡意

與遠翁年盟台

按此橫似與前二續同致一人但遠異文或刊本偶誤耳

尊翰附獻老者猶未到想渠逗遛海昌與康流年兄有商

也承假詠業四帙喜逾百朋讀年翁弁言愴感慨慷令人
涕淚為淫復使鬚眉為戟即當手錄以晤對昕昔更望早
繕文稿用成全璧為快也緇衣坊表同洞璣俱領入惠而
好我何嘗窮海絕崖獲遇航梯之樂耶前睹省示概予冰
釋謂已無擾意外之聞良滋怪歎矣何時鷓首過郡深談
永日吾輩飄淪騷屑惟有良朋聚首與著書自娛弟雖陋
劣願竊餘芬以浣塵面特稔呂相思千里命駕今時勢梗
阻不免清風明月勞勞卒度耳若干兄久不聞問倘晤幸
為弟申意相念之切尚濶鱗羽也草草附候并謝

寄鈿鉉兩兒

吾日圖歸計而為直指強留不肯委署篆者濡滯至今惟

竹林八圩志

卷八 文徵內編

十四

增悶悶今喜代者過來得以弛擔八之日便可啟行家中
親朋俱不必相聞有來接者俱可婉辭吾即于茗中買舟
矣大約望左右可抵家也祖母汝母俱喜平安可為代候
初五日

先虞部澹于浮榮獨敦古嗜乃竟中道以憂死傷哉失
恬之子也今特搜尺牘數幅裝為家寶庶使百世下手
澤嘗存如或見之云爾戊
子冬日男佑紀拜淚謹識

高佑鈿

天樂鳴空集序

按此書為鮑宗肇撰宗肇字性泉營
紙業於嘉興東門外近有郭氏重刻

吾觀舉世學佛信佛者不可勝計而究莫知何法是佛佛
在何所若謂釋迦是佛已從雙樹入滅若謂彌陀是佛乃
隔十萬剎土與我何預焉惟於現前所有一切境界愛憎

苦樂名利榮辱人我毀讚等相果見纖塵不露毫髮不存
方為肉身菩薩方為大乘根器方為人天師範說法利生
非獨口裏談空實能身在空中以至墻壁瓦礫無不談空
恆沙界外悉在身中此即如來本意迦葉真宗而十方賢
聖合掌矣山陰鮑性泉居士實於吾郡之春波里沈酣教
乘著有天樂鳴空集為予祖同年陶州守石梁訂正性泉
臨化以授道友錢永明俾商流傳永老轉以授王文學止
庵筭藏有年丁亥秋止庵晤予於吳巨手師卅齋見示此
書歎為希有予受而讀之中有述予祖及同年王郡守季
常論金剛經大意語携歸以呈先子先子謂性泉蓋久向
大法而尤得力於華嚴合論因舉陶祭酒石簣東袁吏部

竹林八圩志

卷八 文徵內編

十五

中郎云有居士鮑姓日暗誦楞嚴數部善談宗鏡行解俱
佳亦時來共語即其人也遂助繕楮本資先郎中冥福方
謀梨棗抱疴未果己丑歲止庵館于雙谿草堂適吳太史
默冥來顧見此書而喜輒同予助梓若干葉餘尚有待壬
辰冬素華大師來吾里予偕止庵往謁止庵出以是正師
為擊節稱善稍加刪潤促以梓行乃因緣未至筭藏如故
丙申冬止庵病且革楞嚴巨方法師問疾榻前止庵手是
書泣告曰此先大師之手澤存焉師其為我成就宏通俾
有以見性泉永明於常寂光中巨師慨然許諾或謂像季
之哀有漏福因易種而傳持慧命無上功德之不可多得
巨師不顧也多方思所以傳之陸別駕槐眉沈孝廉櫟友

張觀察菊存曹方伯秋岳汪進士滌公捐資倡導感動真如無塵上人登諸緇白克竣厥工一日持示予曰推君夙稔顛末盍以數言為序予思凡藉舌根說法則所化有幾今巨師皈依營泉為江右白法大師之英孫忝學靈峰為古吳素華大師之幹子在當人分中大事已明則躬行實踐令光明遠大輝映古今將致見影聞名悉皆獲益此不勞心力而熾然常說矣何復藉此書以鐸世雖然當大法衰替之日委身拚命竭力告人宣傳慧命正歲寒松柏中流砥柱方為菩薩行也今之號為學佛者未嘗以生死大事為念明心見性為急不工文詞則精書畫不思與佛祖馳驅而欲與工巧技藝度絮長短是必使蘇李班馬諸人

竹林八圩志

卷八 文徵內編

十六

為法王鍾王荆關諸人為闍老然後此輩或得便宜而金色頭陀之侶反為失計亦顛倒甚矣是書出耳聞目擊更無餘法戒慎恐懼到處盡提此事譬如蓬生麻中不得不直將見大家齊唱聖凡同體獅子窟中無異獸梅檀林畔悉成香其功豈不大哉予何人也敢言佛法因先郎中卒期公為雲棲大師入室弟子先大夫寓公公復與雪嶠石雨破山林野諸耆宿往還早幸聞有宗教年來恆從外父譚司成埽庵翁親近諸方知識而八識田中最心折白法老人時參請如實語適更得覲覺浪石奇兩和尚謬許根器不甚闍劣且嘗奉教于靈峰不敢懈怠深喜巨師此舉匡救宗教不獨重其無諾責己也即如離教無宗離宗無

教二語便可一生受用宗教兩得不為名相所膠如謂教在宗外便是依文解義三世佛宛如謂宗在教外便是離經一字即為魔說巨師亟刻此書為學人頂門一針豈無性解相兼之士與之一貫宗教共弘佛法哉予日望之矣秀水懷寓主人高佑紀念祖甫識於新豐鎮之竹林草堂

沈李楷

壽嶽公像贊

和同樂易春風之度剛毅果斷秋陽之晡孝友性成惻隱念篤悠悠林泉好施樂助建祠垂訓開家之祖光于前而裕于後聲為律而身為度廟貌融融子孫蒙福拜手稽首奕世瞻肅

竹林八圩志

卷八 文徵內編

十七

題退庵兄玉照

初披是圖苦不甚似而實亦不能似蓋面貌在風塵之中而精神超世俗之表惟吾與兄習之最深故知之頗真有功於名教無疚於影衾不必登百尺之樓而自作千仞之想展斯圖者以為似亦可以為不似亦可

沈銘彝

封文林郎先祖考遜甫府君墓表

嗚呼我祖考捐館已二十有四年即祖妣亦棄世二十年矣日月遞祖音容不再往歲先考薄宦畿南俸入以養不克葬罷官後復衣食奔走未遂誓墓之懷辛亥先考歸自山左始得以館脩所積葬我先祖考妣於秀水縣穆河溪

穆河即在杉青關之北穆和溪在秀水北鄉祖塋之側先
東禪寺一帶而吳江南鄉黃溪鎮亦稱穆和
考嘗欲自述外碑以告幽明嘉慶丁巳患疾疾纏綿兩載
即棄不肖孤表弗克成在重泉實有餘憾敬惟述祖德成
父志固後死者之責也小子其敢忘焉祖考諱承勳字微
舟號遜甫姓沈氏太學生先世顯宗公諱昌自師橋遷居
嘉興之竹林里八世至思椿公諱學生四人長為華源公
諱鏜累世行善耕讀外無他事華源公生二子次為我高
祖壽嶽公諱治泰高祖生二子次為我曾大父端木公諱
格曾大父早歲艱於嗣息五十後乃得伯祖承烈叔祖承
熙及我祖考三人康熙六十一年曾大父即世時祖考僅
七齡耳宗族內誼蠹莠外逼我生曾祖妣周太君壑而持

竹林八圩志

卷八 文徵內編

十八

門戶訓課嚴肅不尚姑息故祖考一生不知棋局幾道不
識樗蒲齒名周太君教也曾大父精計然術以布業起家
祖考既長嗣其業性仁慈好施予遠近皆稱為長者以食
指紛繁家中落辛卯壬辰先考鄉會連捷蒙恩以知縣即
用祖考寄諭云一行作吏不可改寒素本色勤以補拙儉
以養廉吾雖貧不願因官資增寸椽片土也陽湖少宗伯
莊方耕先生見家書嘆曰直以古名臣相勗也子其勉之
謁選得江西上高縣迎養至署戒以廉俸外不名一錢每
有疑事稟商動中竅要老於案牘所弗如蓋祖考一生酷
嗜史鑑故讀書有得如此考終於乾隆四十二年十二月
二十六日春秋六十有二祖妣高太君同邑太學生廷表

公女自幼寡言笑知書識大體既歸祖考善事周太君得其歡心雖善病不廢中饋事以乾隆四十五年十一月二十八日卒享年六十有四子六人先考諱可培其次也長可均又次為可坊可至可堦可堡女二長適庠生吳鳳儀次適國學生王宗桓祖考以先考官例邀敕封文林郎祖妣邀封太孺人銘彝伏念先代以敦厚傳家祖考少年孤露稟承母教克自樹立及觀義方之訓不讓古人而薰德善良鄉曲至今能道其事殆所謂沒而可祭於社者謹書之以俟志乘之采焉嘉慶庚申

跋外孫唐翰題所藏李衛公上西嶽書石刻

右李衛公未顯時上西嶽書原刻久佚宋時曾兩刻之此

竹林八圩志

卷八 文徵內翰

十九

則明成化間刻於嶽祠者筆法浸失其舊矣然猶存拙朴之氣觀德藏寺碑及李淵為子祈疾記可見至篆書題額十二字乃衛公碑今在醴泉縣係許敬守撰文王知敬書故是原刻與上西嶽書無涉好事者裝在一冊耳道光癸巳七十一翁孟廬為蕉庵題識

跋懷素自敘帖二首

余少時得懷素自敘帖苦乏神趣知為俗工刻壞後於朱友鶴小萬卷樓見一冊亦非其至者往來胸中深以未見善本為恨道光辛卯余年六十有九矣偶過寶稼堂見敞簾中有此帖將付丙丁亟披讀之歎為至寶即向主人乞歸破爛不堪觸手閉戶養疴手為裝裱窮一月之力始克

竣事此停雲館廡填初拓本寶冠諸刻之上其源流詳諸
鉅公跋中珍貴可知無意之中得償五十年夙願豈非至
幸顧余老矣眼昏手戰袁伯業徒虛語耳展玩之餘為之
三歎

是帖留之案頭又匝月矣天中節後三日翰題來雪浪齋
廼以歸之翰題固辭因曉之曰以余之故而重價購歸恬
然若固有之是貪也既返趙璧而仍不勞十五城以得之
是嗔也物無聚而不散今乃欲使之常聚是痴也具此三
者豈所謂不住於相乎感素師默相之靈思寶稼得失之
故嘉翰題屋烏之愛歸之誰曰不宜又記

帆影樓記

竹林八圩志

卷八 文徵內編

二十

携李之區有二水東往由鶴湖入泖者謂之魏塘由柘湖
入海者謂之漢塘朱竹垞檢討詩云聽盡鐘聲十八里平
林小市入新坊是也吾翰題外孫世居漢塘之上臨水小
築為誦絃精舍漁唱菱歌與讀書聲相聞余既以波穩處
三字顏之矣登樓則漱乍諸山數痕螺翠自遠而來近則
方罨圓沙水木明瑟而帆檣陣馬之奇即晨烏夕兔無不
掩映几席間因名其樓曰帆影繪圖徵詩一時名流爭為
題詠夫帆影在今日為習見耳他時搏扶所至偃帆楚雲
乘帆吳月一片破將霜玉百幅展盡芙蓉其以帆為詩料
者當復何限則今之支頤索句殆帆之初哉首基乎昔穀
水一蹄沚自阮嗣宗居之後人稱之曰阮曲唐人遂襲其

例為僕射波為郎官湖地以人重誰曰不然翰題年未弱冠令名遠聞異日者安知平林之帆影樓不與阮曲諸名蹟相媲美耶因其請書額字縱論及之

與某書

按此似致趙
蕉雨明經者

霞梯大集細繹數番么絃獨張靈響自結故宜高豎一幟聞諸公欲為吳二瓢翁選刻遺詩誠藝林佳話但聞屢次與人商榷前則守白繼以柳東此固鄭重將事欲使無懈可擊之盛心二瓢有靈定呼知己然而鄙意殊以為不必也蓋詩者人之性情各有性情即各有面目沈宋之不能溫李猶韓孟之不能為元白錢劉之不能為盧仝李賀也今以二瓢之詩託人酌改無論其人之不能改也無論其

竹林八圩志

卷八 文徵內編

二十一

改之當與不當也而以他人之性情面目為二瓢之性情面目固已偵矣夫二瓢詩之能傳與否固不敢知然一生心血所萃且其稿又經親手訂定其中一二率筆疵句誠難保其必無然斷無大刺謬者此可懸揣而知之也况此舉係鳩貲為之趁此同人踴躍之時一鼓作氣可以奏功若狐疑猶豫往往時過境遷而仍歸子虛者由於矜慎太過也再者當湖近有續携李詩繫之輯已有成編其體例一準南疑又執蓋棺論定之說凡生存者不錄鄙意吾鄉詩集其已經刊布者自能採入惟潛德未彰亟宜代為搜輯即如君家興甯公功德文章烏可湮沒祈錄數首寄來以便轉致卷首并希作小傳一篇蓋此等鉅選有因人存

詩因詩存人之通例不必定專門名家也又松賓先生詩集未刊亦希寫來入選又新坊家稚春先生遺稿其家已無可問意施笙潔表兄處必有之笙潔與麟臺相善望托麟臺屬其鈔錄一帙諒表微盛意不啻其好事也

題渭濱遺像

長兒渭濱乳名多福生于乾隆癸丑殤於嘉慶己未周晬能語聰穎絕倫時先考妣俱在堂愛之如拱璧先考得中風疾凡三載余與婦及女三人夜間更番侍疾常至達旦以兒甫卜禘令其早睡輒依依不去善伺意旨一如成人迨殤去先考每搥床而哭曰天平何奪我書種也後十七日而先考捐館其時全家麻衣如雪哭聲連綿親友之

竹林八圩志

卷八 文徵內編

二十二

過其廬者莫不墮涕兒葬於東洲橋北有碑標墓此幘為金君蘭岫所繪每于歲首懸諸別室余過之輒閉目不忍視今且三十三年矣三伏曝書偶見之乃為記此且以喻我子孫我之隱痛尚無窮期歲首懸祀之例當體我之意而毋遽廢焉道光辛卯

自靖錄攷畧序

古稱伯夷叔齊在周為頑民在商為義士蓋一代之興不有從龍誰佐治安不有采薇孰敦名教二者本不相悖故夫子於管仲不責其死而殺身成仁未嘗不推重於志士仁人也當明祚顛覆死者甚眾且慘碧血丹心照耀千古將以垂後禩而備國史之采焉可令其湮沒弗傳哉吾里

高厲公先生以讀書世其家為文士出宰衝邊全城死守
為才吏漚血上書為父訟寃為孝子甲申以後忍死奉母
觀其弔同年殉難詩云可憐李黼榜偃蹇老維楨又病中
述志詩云惟將前進士慘淡表孤墳蓋其低徊結轡有餘
悲焉此自靖錄所以作也先生卒於順治戊子正月此書
末卷載及癸亥臺灣平之日則長公佑鈺所續又徧走南
北乞資舊雨方得付刊刊成秘不廣印以板置所居光裕
堂複壁中乾隆丁酉先生之曾孫士敦作令山左黃縣其
婿范璐恐有諱忌取板火之靡有孑遺嗚呼明末死事諸
臣我世祖皇帝既易名褒闡康熙十八年聖祖皇帝詔修
明史徵遺書凡明末紀載進呈乙覽者不可勝紀今上於

竹林八圩志

卷八 文徵內編

二十三

丙申之春復加意搜訪惟恐潛德弗彰特命輯勝朝殉節
諸臣錄賜專諭通諭多至一千六百六十六人使以此書
上於朝當更多褒卹奈何付之一炬使忠烈之精氣鬱而
不伸此考古之士每為之髮植毛豎太息扼腕于不學無
術也銘葬為先生同里後進束髮後聞長老言即知先生
忠孝兩全心切仰止又自戊戌年復哉翁士敦歸田後不
時過從得讀太常屯田虞衡行狀及所著述益歎清門為
東南冠冕而詢及自靖錄復翁亦云未嘗刷印庚戌春復
翁捐館是秋其子恪亭相繼化去數年中光裕書畫玩好
及先世墨寶盡為人攫去無存余每過其廬不勝雲烟過
眼之感他物如此則自靖錄之不可復求于碧落黃泉間

固不待言矣今年三月十六日偶過同里福邨橋趙氏宅無意之中忽見此書于度閣上書面灰塵積寸有餘拂拭出之喜不自勝即以重價易歸蓋趙氏之先名學昌字翰書康熙戊子鄉貢進士曾宰廣東興甯此書廼其手錄已及百年紙墨如新神靈呵護良非偶然繙閱一過知其於殉節故實直言其事並無譏議本朝之語其為可傳無疑正如祖伊奔告第痛惜殷之所以失絕不議周之所以得於以見厲公先生才識之高而余於此書始則求之而不得繼則不求而得之非平生一大快事歟乾隆乙卯三月二十日書於金鷺山館

唐紀勛

竹林八圩志

卷八 文徵內編

二十四

守約學會小引

士生今日猶沾沾然博聲譽求富貴忍乎不然而或薄新守舊崇西鄙中可乎嗚呼由前之說天下之所以積弱由後之說天下故不能自強於此而不安於忍欲求其可也將矯激之乎將調劑之乎雖然大地七十萬里人民四百兆視我儕渺然之身直太倉之稊米耳擊之難為擊支之不足支也然而不能愬然置者則以匹夫雖賤與有責焉然而不敢奮然興者則以狐裘蒙茸誰適從焉幸也當我學會創始之時適南皮尚書勸學篇出尚書當今之偉人也行必可法言必可則其書平正通達有實功無流弊其內篇之八曰守約敘篇之旨曰喜新者甘好古者苦欲存

中學宜治要而約取焉竊為進一解曰治要約取宜惟中學西學亦然然故無支離無愒恍無離經畔道之害夫而後知新以守舊守舊者不為舊拘通中以學西學西者不為西變由是膺聲譽則不愧處富貴則無慚夫何樂而不正所守也夫吾人果各正所守天下若亦共正所守則實學興通才出轉弱為強國家其庶有馮乎故以守約名吾學會蓋一切規模約之又約尤為名當其實也所定章程則宗勸學篇大旨云

按引言之後綴章程三種曰講學章程其目十曰崇宗旨明體用去門戶戒標榜務平實求通達立課程定會期閱報章防醜毒曰購書章程其目四曰集股購書定期報推廣曰藏書章程其目四曰藏度收發編目經理並附調書符式幅溢不備錄為摘其概於此

竹林八圩志

卷八 文徵內編

二十五

祝廷錫

竹林項氏世系記

竹林西北隅為里仁鄉十都之西張圩相傳有南項北項世家也余鄰人陳氏子贅南項一日以叢殘小冊來視之其家譜也中錄嘉慶庚申余妻族曾祖沈竹岑先生跋云襄毅喬孫有君與余俱世居竹林里數相過從是知項氏之在竹林與沈氏同其久遠矣譜祖商之名謨者四十九傳至宋之名思者自洛陽扈蹕南渡是為大理評事公評事生晉晉生燁燁生相為開禧紹定間翰林學士建孝友堂於携李相生棟棟生澹如澹如生振振生欽欽生八一八一生儀甫儀甫生伯通伯通生雲谷雲谷生永原永原

生景亮景亮生衡衡三子曰忠質文忠即襄毅為明名臣
竹林之項祖質故不詳忠文之系質生長葛令成化辛卯
舉人綱綱生贈郎中銓銓生廣東布政司參議嘉靖壬戌
進士篤壽篤壽生四川布政司參議萬曆丙戌進士德禎
德禎生雅州牧崇禎辛未進士聲國為大學士朱國祚塔
無子以德禎弟懷隆兵備道萬曆己未進士夢原之子端
端之子階平為後娶譚貞良女生增鈐增鈐字丹書其
後徙平湖鈺字雲樵鈺生熊亦名光覲字卜田太學生娶
車氏車氏之在嘉興者不甚著而西張圩之車至今尚有
多人其地有曰北車埭南車港與南項北項壤相接也北
車埭第宅之基甚廣今尚可見惜其譜系無存而父老亦

竹林八圩志

卷八 文徵內編

二十六

語焉不能詳也項氏之居竹林雖不可考而譜中載卜田
父雲樵所作詩文有代仁莊橋廟僧德明募建仁莊橋疏
橋在其居之西北隅意者及雲樵之身或其祖若父已居
於此矣故卜田遂婚於車也卜田之子令德令儀儀為人
後德娶趙學昌女趙亦竹林著姓也生蔭崑蔭生宗禮宗
敬禮生士欽士鉗敬生士錫崑生宗儀字佑軍亦曰有君
即與沈氏過從者也宗儀生士鏞鏞生福生譜系止
此其後熊識云我家自洛陽扈駕南渡至先曾祖仲展公
始輯譜後四十餘年伯父丹書公復旁搜遠紹校閱十餘
年僅乃得成則此譜昉於聲國成於增鈐而錄於宗義者
也自宗義之孫福生後世系不屬遂不可考項者南項且

贅陳氏子襲其姓矣喬木世家至此遂已然猶得藉此叢
殘小冊以攷見自商以來七十餘世之譜系而最近五六
十年間轉不能詳可見文字之足貴矣故撮其系而著之
於篇仍歸譜其家

竹林八圩志卷八 畢

竹林八圩志

卷八 文徵內編

二十七